

防
河
奏
議

防河奏議目次

卷六

高堰山圩石工告成

附紀

開懇版荒柳地

修建劉老澗減壩等工

附紀

覆部駁堰圩戩工

恭請

御製高堰碑文

修建湖神各廟

石土人員補用沿河州縣

稽查工料條例

建築龔家營徐家莊月堤

恭報秋汎水勢平穩

增定葦蕩營柴束

定兵夫積土章程

防河奏議卷六

李太僕奏鑿金匱壩御覽卷六

高堰山旴石工告成

題爲恭報高堰山旴石工告成仰祈

睿鑒事欽惟

皇上

德溥堯仁

功高禹迹

平成永賴萬方沐清晏之庥

底定興歌億兆被盈寧之福

聖謨弘遠籌一事而必計及萬全

睿算精詳建一業而定垂諸永久以高堰爲黃淮
之關鍵甃砌宜崇大堤乃民社之屏藩增培
須固

特頒

諭旨發百餘萬最多之

內帑擇吉興修

簡命卿僚舉數千年未備之大工乘時監築一夫

一料不動民間寸石寸工均銷正項匠役應期而雲集工員趨事以星馳惟是購辦紛繁旣轉輸之不易洪湖浩瀚亦濟渡之維艱仰蒙

聖主敬誠兩載西風寧靜因荷

神祇默佑頻年洪水安瀾是以鼓枻揚帆載花山呂梁之石爭先飛輓編簞結筏下荆湖豫章之木協運儲需萃千里百里之良材備千夫萬夫之工作陶人埴埴堆垛崇墉冶氏鑪

鍾鈞聯作錠椿排馬齒櫛比深根石甃龍鱗
縱橫峭壁金錢給賞夫役懽騰令甲綦嚴旦
明儼辦臣等或按時查閱或常川督修料物
極其精純筍縫極其脗合汁漿極其充足土
戩極其堅凝曲者環灣肖波流之迴轉直者
矢棘循岸勢之斜飛磚工土工底四十餘仞
面二十餘尋從未有如此之寬厚順砌丁砌
累十有五層高十有八尺從未有如此之崇
隆高澗以南周橋以北迤邐六千餘丈延袤

四十餘里從未有如此之綿長經始於庚戌之秋告成於壬子之夏四時料物邁行再歲工程竣事從未有如此之迅速皆由我皇上軫念運道民生體效

天地之心以爲心斯感召山川百神奉若

皇上之事以爲事會陰陽風雨之協相成水土金木之功能由是東洪湖千頃之波而敵黃有力濟運愈見其深通護淮揚萬墜之田而循軌無虞居民得安其康阜共慶

皇圖鞏固兩河均沐

鴻庥咸賡

聖壽無疆萬世常霑

愷澤茲准

欽差原任戶部右侍郎臣汪澂等會咨高堰大工
已於雍正十年六月十七日一律告竣等情
到臣并據署淮揚道印務夏建德詳報前來
除移咨督臣尹繼善會勘收工并飭淮揚道
將工程丈尺用過銀兩造冊另疏具

題外所有大工告竣日期理合會同署理江南
江西總督印務蘇州巡撫協理河工事務臣
升繼善原任戶部右侍郎臣汪澐原任內閣
學士臣張坦麟通政司右通政降三級調用
臣宋筠御史管坐糧廳事在任守制臣程仁
圻合詞恭疏

題報伏乞

皇上睿鑒施行雍正十年六月十八日

題奉

洪澤湖爲東南諸水總匯之區全賴高堰大堤以爲保障朕特發帑金命河道總督欽差大臣等指示督率建立石工以爲久遠之計乃二年以來風濤恬靜汎水安瀾工作易施成功迅速此皆

湖神默佑之力朕心深爲感慶理宜虔誠展祀以申報享之忱其湖神廟宇或重加修葺或擇地建造著總河嵇曾筠等確查定議具奏此次修築堤工之大臣官員及効力各官悉心辦理俱

屬可嘉着分別議敘具奏該部知道欽此

附紀

嘗攷淮自桐柏發源挾七十二山河之水歷
千有餘里經鳳泗以滙入洪澤淼茫浩瀚一
望無涯西風驟作銀山湧地雪嶺界天若非
約束狂瀾逼使湖流盡出清口敵黃東注刷
沙歸海何以保障淮揚護衛漕堤而高寶興
鹽七州邑之廬舍田疇難免胥溺則是高堰
一堤誠淮南之門戶黃運之關鍵也自漢陳
登創築以後明陳瑄大葺之潘季馴復加修

治然土石間築且格於時議未能悉力經理
迨至我

朝歷任河臣仰承

聖祖仁皇帝睿謨指示增修加築易土以石堅閉六
壩而敵黃有力建置滾水而宣洩得宜留南
北天然二壩而異漲有備章程亦大畧定矣
惟是洪湖風浪不時易於震撼且石工舊制
既卑上用草土加鑲終非經久之策我

皇上繼

天繩武洞悉全河形勢機宜

屢念高堰一工爲南河第一險要雍正七年十月
特頒諭旨大發帑金百萬兩

簡命卿寮來淮監理凡工之卑矮殘缺者概

命加修石工一律高厚堅固以垂永久誠

神明乎黃淮強弱之機洞燭乎借助分合之妙雖

大智如禹莫能過也前河臣孔毓珣撫臣尹

繼善等欽承

聖訓率同淮揚道白鍾山詳加審度若者重修若

者拆砌遴委人員預脩工料正擬興修適臣

會筠

調任南河首詣工次審察諮諏道廳具

冊以對復爲斟酌詳核物料之漏估者加增
入冊承修之罷玩者斥易其人度椿木之徑
圍較磚石之尺寸驗米汁灰漿之濃淡稽鈎
聯錠錫之重輕夏秋水長帆檣雲集預儲料
物冬春水落工作齊興及時斲砌事事恪遵
諭旨與監督諸臣往來經理開誠曉諭俾承辦工
員殫心趨事應役夫匠奮力赴功務期永遠

鞏固以仰副

皇上慎重要工保惠黎元之至意更賴

聖主誠敬感孚

神靈默佑兩載以來西風不作舉凡運送木石
等料由江入運由黃入湖素稱險阻者波浪
無驚舟航利達物料應手工程亟償經始於
雍正八年十月至十年六月告竣緻密高堅
逾於曩制蜿蜒綿亘屹若金城收束淮流既
暢出敵黃而黃治黃水循軌則永無倒灌而

運治黃運河湖共慶安流

國計民生長資利賴淮揚億萬姓額手歡呼焚香頂禮齊祝

聖壽無疆環額代爲

題謝

臣曾筠

與在事人員恭逢

盛事目觀輿情懽忻抃舞欣慶難盡謹拜手稽首以紀

聖德神功傳諸永永無極而已

開墾版荒柳地

題爲請墾版荒柳地以裕工料事該臣等看得江南臨河各堤內外向有官地栽植柳株以濟工需雍正三年經前河臣齊蘇勒

奏明每歲令官民捐栽年底造冊報部分別議敘在案除熟地及新淤地畝種柳皆得長成外其年久舊園所栽之柳不能茂盛兼之從不一施犁鋤以致日漸枯息柳根盤結地內竟成版荒前河臣孔毓珣曾經飭行各屬查

明版荒地畝應行開墾者分別造冊詳報祇因地畝未得查清是以未經具

題

臣到任後復又查案飭催旋值雍正八年秋

汎水長難以查勘今復通飭各屬逐一確查去後茲據署淮揚道印務夏建德淮徐道副使呂維炳會詳稱遵卽確查各屬柳園地畝除現在長柳蕃盛之地毋庸墾種外其餘邳宿桃山安外河等各營汎內現在共有版荒地八百六十九頃六十六畝零募民領墾因

係在官地畝墾熟之後仍要歸公彼此觀望
不前查新設堡夫雖有防守堤工擡積土牛
修補水溝浪窩之責但伊等住居堤旁家中
又有餘丁若將版荒地畝着令就近分領耕
種甚屬便易其每年開墾所獲籽粒聽其收
取以償工本稽草令其交工以充公用五年
之後地內盤結柳根俱可悉行鋤淨仍將所
種之地責令守備千把督率兵夫全行栽柳
如此則沿河一帶柳地俱得轉荒爲熟將來

栽植柳株自必發生榮長草束亦皆暢茂適用有裨工需良非淺鮮矣其堡夫每年應分給地畝若干統候奉

旨允准之日另造細冊報部外所有各營版荒地畝確數并應給堡夫領墾五年後責令守備千把率兵栽柳之處相應會

題伏乞

皇上睿鑒勅部議覆施行雍正十年八月初三日
題奉

旨該部議奏欽此部議准行雍正十年十一月十

四日奉

旨依議欽此

修建劉老澗減壩等工

題爲亟請修築閘壩埽工以利蓄洩以資捍禦
事該臣等看得宿遷運河乃分黃河駱馬湖
及東省諸泉之水濟運最爲緊要舊時湖之
對岸黃運交匯之處有東西竹絡石壩二座
康熙六十一年經前河臣陳鵬年修築東竹
絡二十五丈西竹絡一十五丈中留口門一
十五丈以作湖河關鍵祇因年久不修竹絡
損壞無存且當湖水頂冲之所碎石冲淌沙

淤現今止存壩形共三十七丈若不照依
在壩形加修添建竹絡石壩難以收束水勢
又運河西岸內有黃墩一湖上受徐邳睢三
州縣唐宋山等處會歸之水因岸繞堤環水
無去路遂致日積日盈每遇風浪撞激堪虞
查運河堤岸舊有民間傾圯涵洞石塊應拆
取添新於西岸建造小石閘一座宣洩湖內
積水不特堤工可保無虞卽漕運民田亦資
利賴工費無多甚有裨益又中河北岸舊有

劉老澗九孔八礮心減水石壩一座以備伏
秋汎水長發開放宣洩水勢保固兩岸堤工
康熙五十七年經前河臣趙世顯

題請移建之後歷今一十四載每遇開放勢若
建瓴下口三合土歲受冲激遂致跌塘石壩
下雁翅底石上口寬二十丈下口寬三十一
丈直長八丈以及舊釘椿木悉皆冲損查此
壩乃中河蓄洩關鍵若不及早修砌將來冲
動礮心必致工費浩大又安東縣黃河北岸

劉周二莊正當黃水大溜掃灣頂冲之處河
崖日漸塌卸一線沙堤難資捍禦必須建築
埽工方保無虞以上各工臣於秋汛之前查
勘情形卽飭淮徐淮揚二道復勘估修去後
茲據淮徐道副使呂維炳詳稱宿遷運河與
黃河交匯之處應修竹絡石東壩新舊共長
二十九丈西壩長十二丈共估工料銀一千
三百零九兩八分八釐又西岸應修小石閘
一座除需用裹石底石查有民間舊涵洞年

久傾廢石塊選用以節錢糧外計估工料銀一千零三十九兩六錢九分零又北岸拆修劉老澗減水壩石底并三合土共估工料銀六千三百八十八兩八錢三分零又據署淮揚道印務夏建德詳稱安東縣黃河北岸劉周二莊建築樓崖順埽外邁沉水大埽計工共長一百三十丈共估工料銀六千九百五十兩五錢七分零各造清冊詳估前來臣復勘核無異除一面照例動支河庫銀兩給發

各廳辦料募夫興修派委淮徐道呂維炳
淮揚道夏建德監工督催併原冊送部查核
外臣謹會

題伏乞

皇上睿鑒勅部議覆施行雍正十年九月初四日
題奉

旨該部議奏欽此部議准行雍正十年十二月初
二日奉

旨依議欽此

附紀

江南運道自開闢中河以避黃河之險東南
歲漕數百萬石輓輸利便上達

天庾厥功甚鉅嗣以中河尾段逼近黃河復自桃
源之盛家口起改挑六十里名曰新中河又
慮新中河河身淺狹不足行運更於三義壩
以下川新中河之半以上仍舊中河之半合
爲一河漕渠之制幾備復蒙

聖祖仁皇帝改運口於楊莊俾糧艘順流渡黃輓運

更易

創千古未有之模垂萬世無窮之利尤爲盡善盡
美統計運河自黃林庄以及瓜儀爲道千有
餘里其間涵洞閘壩蓄洩機宜雖有已定之
成規尤貴因時而補救如宿遷運河之駱馬
湖口乃黃運二河交滙要區操縱盈虛權衡
消長全賴於此仰承

聖祖仁皇帝特諭開通黃河口門東西建竹絡壩以
爲河湖關鍵法良意美欽遵罔斁第歷年旣

久竹絡毀壞碎石冲淌

曾筠

往來查勘未雨

綢繆每思善後亟請增築荷蒙

聖主洞悉情形卽

賜俯准從此湖河吐納互相挹注以資利涉千櫓

啣尾兩岸盈寧

國計民生均有裨焉再查運河西岸內有黃墩

一湖乃銅邳睢三州縣及唐宋等山諸水會

歸之壑祇緣岸繞堤環水無去路每遇風浪

汕刷堤根因查堤內原有民間廢棄涵洞石

塊現存應拆舊添新建築小石閘一座不特
消洩湖中泛溢積潦田廬可免淹沒且運河
水小之年並可資其利濟至中河東岸又有
劉老澗減水石壩一工原設以洩伏秋異漲
瀉入六塘河歸海此與清河境內之鹽河閘
呼吸相通一遇汎水漲發上下開放庶水有
分洩上游不致爲患此皆運道喫緊要工修
舉刻不容緩者蓋運河之水少則易竭多則
易盈固貴廣引其來源又貴疏通其去路况

宿遷一帶運道來源甚廣其勢易盈使宜洩
失宜則窄狹河身不能容納必致漫溢是又
不可不審察者也至于挑濬之工尤爲運河
要務如桃源古城之砂礮溜係山根餘氣砂
積成灘橫亘河心流分兩股水小則膠舟水
大則壅潰糧艘經行每以爲慮論者皆曰河
底礮砂人力難施且運河舟楫往來如織難
以築壩興工故歷來未敢輕議疏濬曾筠則
驗勘砂性審量水勢決計挑挖於河之一股

築壩斷流仍留一股通行船隻更畚挑浚兼
工疾僂不旬日而向之阻梗者轉爲利涉矣
可見事貴因時變通不可狃於成說又如此
茲因修劉老澗等工而連類記之俾司河者
知所留意焉

覆部駁堰圩戩工

題爲恭謝

天恩事該臣等看得高堰山圩一帶幫戩堤工前
經臣將用過銀兩核明

題銷奉准部查冊內就近取土每方銷銀一錢
三分查徐屬廳雍正四年分亟請下埽等事
案內近處取土每方止銷銀一錢二分五釐
今每方多開銀五釐又積水坑塘遠處取土
每方銷銀一錢八分查外河廳雍正四年分

亟請幫築等事案內遠處潭地取土每方出
開銷銀一錢五分今每方多開銀三分應令
查明核減再河工需用草束向令河兵開採
不計錢糧今冊內核算數目用過草束至三
十四萬九千六百餘束之多因何不用兵採
草束全行購買卽或用草繁多兵草不敷亦
應將購買緣由逐一聲明以便查核至僱募
夫工一項臣部查堵閉瓜洲運口等工案內
將每日用夫名數做工日期及每日給價若

干之處逐款開註分晰今前項工程需用釘
椿拉埽等項夫工並不將每日用夫若干逐
款分晰總以籠統開載再需用椿木五百三
十五根冊內祇有圍圓徑寸並無長短丈尺
殊難查核事關錢糧均難遽准應令該督等
將土方多開銀數並不用兵草之處據實核
減并椿木長短丈尺及需用夫工等項數目
逐細分晰聲明另冊具題到日再議等因奉
旨依議欽此欽遵移咨到臣當卽轉行遵照分晰

聲明據實核減詳報去後今據署淮揚道印
務夏建德詳稱查堰盱二廳幫戢堤工內有
填墊馬路之土雖係就近取用實從水內撈
取並無路徑是以每土一方實用銀一錢三
分有難與徐屬廳雍正四年分亟請下埽等
事案內就近取用乾土止用銀一錢二分五
釐之例可比者至遠處濶地取土查別工未
有積水坑塘夫役挑運俱從直路卽可到工
今堰盱一帶堤裏因多積水坑塘必須遶濶

越徑方可到工較比別工遠處濬地取土之路不啻兼倍是以每土一方實用銀一錢八分亦難與外河廳雍正四年分亟請幫築等事案內遠處濬地取土止用銀一錢五分之例可比再查填墊馬路與堤堰下埽所用購草乃在二三月間開工償做本年尙未有兵草是以全用購草因係循照河工通例購用故未於冊內聲明至需用人夫自應遵奉部查照依堵閉瓜洲運口等工之例將每日用

夫名數開造但查堵閉瓜洲運口工長
一十五丈按日計算共用人夫三千七百五
十名今該工因係積水不敢比照黃運兩河
興修大工之例按日計算故每工一丈止用
夫十名共工長一百六十丈五尺二寸共用
夫一千六百名照例每名日給銀四分俱係
實用再冊內開用尺七椿木五百三十五根
祇有圍圓徑寸並無長短丈尺查歷來報銷
舊例俱係照依圍圓徑寸之大小核銷價值

之多寡從未照依長短核銷所以當日亦照例止開載圍圓徑寸未經開報長短丈尺前於擬定成規等事案內會詳請照現在購買椿木酌定長短丈尺造冊報部核示頒行以雍正十年爲始凡有歲搶新工照新定長短丈尺之例估銷著爲定例遵行等情

題明在案今堰圩戢土工程所用椿木乃係未定成規以前其長短丈尺未便照依現在購買丈尺朦混開報相應詳請

題覆仍照原冊准銷等因前來臣等復核無異
相應會

題伏乞

皇上睿鑒勅部仍照原冊准銷施行雍正十年十

月初二日

題奉

旨該部察核具奏欽此部議應令該督等飭令承
修之員逐段分晰道路遠近乾澇土價據實
核減確查保題到日再議等因雍正十一年

二月二十六日奉

旨這本部駁是但嵇曾筠所奏朕可信其無浮冒之處且嵇曾筠辦事勤明屬下承修各員亦不能朦混著照該督所奏准銷欽此

恭請

御製高堰碑文

題爲

聖主鴻功普慶濱湖億兆情慙恭請

頒賜碑文以垂萬禩事欽惟我

皇上

功恢禹迹

德峻堯年

手畫平成于九州以樂利

心參造化致萬國之盈寧旣治旣安一勞永逸
或疏或濬百谷朝宗固已瑞應河清福如川
至乃猶念洪湖爲黃運兩河之樞紐首重宣
防高堰乃淮揚二郡之屏藩尤須培護垂諸
永久

殊恩出自

宸衷計及萬全

乾斷不由

廷議爲運道謀奠安之計籌維何啻再三念民

生立永固之基

發帑動盈百萬庀材悉備萬役歡呼趨事維勤
羣工踴忭尤喜

天心感格頻年日麗風和加以

神力昭靈再歲波恬浪靜慶奏功之迅速兩載
告成遵

聖訓之勤惓一夫不擾從此輓輸攸利隨時總慶
安瀾因之耕鑿咸寧是處均沾

愷澤衢歌巷舞靡不擊壤以騰歡華祝嵩呼俱

切焚香而頂戴仰惟

皇上爲民創建之

鴻烈功奠山川

皇上爲民保護之

聖心光昭日月恭懇

堯章丕煥以誌

天庥

義畫弘開以彰

神應欣睹千尋萬丈之金堤玉堰一律告成務

俾萬載千秋之磐石苞桑遞相保固謹據輿情籲請伏祈

御賜碑文永飭河工官守天下臣民瞻

睿藻而敬悉

至誠大德之精虔覲

宸章而愈圖鞏固隄防於悠久將見勒岐陽之石應地無疆峙岵嶴之碑與

天同壽茲據署淮揚道夏建德轉詳前來相應恭疏具

題伏乞

皇上睿鑒施行雍正十年十月初二日

題奉

旨該部議奏欽此部議准行雍正十年十一月二十七日奉

旨依議欽此

修建湖神各廟

題爲湖神特荷

聖恩遵

旨確查定議據實奏

聞以光祀典事竊惟洪湖巨浸滙七十二支之水
力制黃流高堰長堤輦百千萬載之基永安
淮甸欽惟我

皇上聖智周而德同無間平成奏而功溥咸寧奠
流峙以興舉

鴻猷並升恒以永昭

丕烈特發百萬兩之

國帑興修千萬丈之石工一從經始恬浪無驚
兩載迅成安瀾有慶廼我

皇上彌隆謙德歸功於默佑之明神特展

聖誠復沛以報功之盛典其湖神廟宇或修或建

命臣等確查定議具奏

臣欽遵

諭旨矢誠矢敬悉心查核高堰湖堤各廟宇內有
禹王廟一座昭隨刊於四乘奠嶽瀆於萬年雖

祀享遍於東西南朔之方而尊崇尤切於河
濟江淮之會亟應聿新廟貌以沛

皇恩茲據淮揚道確造估冊現經發帑興修尙有
盱眙縣淮瀆廟棟宇傾圯應與堤頂之關聖
廟黃堽寺一體邀

恩重加修葺再查專司洪澤一湖向有許譚二廟
許神名遠共張巡而史稱唐室忠良守睢陽
而功作江淮保障爰稽鄴陽血食張巡已著
於西江今此洪澤荐馨許遠尤昭於淮右譚

神名易義彰明代靈著

熙朝每示兆於湖風欲發之先諸父老之傳聞最確常保安於堤岸瀕危之際前河臣之記載甚詳以上二神均於洪澤湖堤彰靈默佑濟運保工最爲顯應仰蒙

聖主攄虔復據輿情籲懇

臣

備查經傳望於山川

徧於郡神又曰有功德於民者則祀之能禦灾捍患者則祀之允合禮經兼符祀典伏乞溫綸特沛並錫蒸嘗則此洪澤波恬悉荷

恩光普被瞻

禹王之廟貌翬飛鳥革長昭沐日浴月之區

錫庶祀之馨香鳳詒龍章永護億載千秋之會
矣除將估修各廟工料銀三千八百餘兩清
冊并許譚二神事實冊一併送部查核外理
合恭疏具

題伏乞

皇上勅部議覆施行雍正十年十月二十六日

題奉

旨該部議奏欽此部議准行雍正十一年二月

十一日奉

旨依議欽此

石工人員補用沿河州縣

題爲請

旨事竊照高堰石工荷蒙

皇上特頒百萬帑金

命往効力多員來工分段承修現今一律告成萬
世永賴復荷

恩綸議敘通工感戴

皇仁莫不懽忻鼓勵伏念錢糧工程均關重大承
修各員俱有保固之責未便遠離查雍正五

年經前河臣齊蘇勒

奏稱黃運兩河攸關緊要沿河州縣同心共濟
呼應靈而成功速是以河南定例遇有濱河
州縣缺出將通省熟識河務之州縣調補而
山東沿河州縣亦蒙

聖明遠照

特旨俱着揀選賢能之員補用現今印河兩官合
而爲一共相協濟甚有裨益查江南徐邳豐
沛蕭陽靈璧睢寧宿遷虹縣桃源清河安東

山陽寶應高郵江都等所屬沿河十七州縣
爲黃運兩河必經之地百川總匯之區甚爲
緊要嗣後遇有此等沿河州縣缺出仰請

皇上勅令江南督撫亦照東豫兩省之例於所屬
現任州縣內揀選會同保

題引

見調補如州縣內難得其人卽在佐貳各官內揀
選保

題補授再查豫省奉

肯定例沿河府州縣有才嫻河務者准令河臣會同撫臣保

題陞調河工之道廳其河工廳汛有才守兼優者准令河臣會同撫臣保

題陞調沿河之府州縣通融調補更於河防有裨等因奉

旨照該督所請行欽此欽遵在案仰見我

皇上慎重河防愛惜人才之至意今承修石工人員內有候補知府知州知縣以及在部學習

并佐貳等官業已工完事竣念其趨事大工
勤勞三載且辦運木石遍歷黃運河湖河務
甚爲嫻習合無仰懇

皇上天恩准臣於此等人員內除遵

旨送部各員外擇其明晰河務而又謹慎勤敏堪
膺民社之員如遇沿河州縣缺出詳加選擇
咨送督撫各臣驗看會同保

題恭候

欽定補用如此則不必於現任州縣內另諮熟悉

河務之員以省更調之繁而伊等向係經修
高堰石工亦可就近保固呼應得靈其於重
大工程更爲有濟將見得人而共効循良保
工而彌增鞏固民事河防咸沐

聖恩於天高地厚矣再查沿河自徐邳以迄淮揚
各府州縣暨新分之阜寧甘泉二縣外其盱
眙泗州地方坐當洪澤大湖今新建高堰大
工修防保護攸關綦重盱泗二缺自應比照
沿河之例一體揀選合併陳明理合恭疏具

題伏乞

皇上睿鑒勅部議覆施行雍正十年十月二十六

日

題奉

旨該部議奏欽此部議准行雍正十年十二月二

十二日奉

旨依議欽此

稽查工料條例

奏爲敬陳稽查料物之法仰祈

睿鑒以垂久遠事竊照江南黃運湖河險工林立
所賴者修防而修防全在料物之充足庶不
虛糜帑項工程得收實效是料物實爲河工
第一要務臣抵任南河以來目擊汎險工多
歲需物料帑金較之豫東二省不啻數倍誠
恐稽查不實上負

聖主委托之重是以臣殫心竭力設法嚴查并

題請照豫省之例在於霜降後卽將次年應用
工料預爲儲備令沿河州縣盤查出結在案
又將廳庫外解河銀一項

奏明不許廳員指稱辦料擅自動用近來各廳
亦知畏懼不敢那移虧空惟查料一事欸項
繁多卽如葦柴一項內有領帑新辦之柴有
舊日用存之柴有葦蕩管額派應用之柴有
緩工轉運險工之柴有預備上游新工之柴
有各廳協濟搶險之柴在州縣止知見料卽

盤不能分晰孰爲某欸某料誠恐不肖廳員以舊作新彼此牽混若物料不能核實則工程必致虛浮今臣悉心籌畫謹將查料之法行之有效者四條敬爲我

皇上陳之一各工物料當酌量預儲數目以便查察也大凡各廳每年需用之料雖多寡難以預定但工程之平險情形可以預爲測度請銀購買之時卽當酌定工程首險次險各應貯料幾何預爲呈明以便飭知委員按數稽

查至臨期或有昔平今險昔險今平之工卽
可將緩工物料轉運險工濟用如此則各工
緩急有備而查察分明亦瞭如指掌矣一各
工收到料物當編號標記以憑稽核也凡到
工之料誠恐應汎以少報多彼此牽混等弊
今臣俱派委効力官公同查收挨次編立字
號插立號樞前面書明某款某料某日到工
續到者挨次堆垛至臨用之時在於號樞背
面書明某月某日修做某段工程用去并載

明存廠冊籍以便不時查對至霜降後各工
用存物料查明數目算入次年項下工用則
指舊作新希圖冒帑之弊自可杜絕矣一於
運料要地設立總廠以查多寡虧足也各廳
內除山安海防二廳柴束毋容運至清江并
各廳採買秫秸椿檉纓纜草束俱於該廳本
工設廠委員秤盤圍量分別查收外其餘所
用葦柴概由清江經過各廳向日亦俱設有
料廠在浦堆貯陸續轉運本工是清江旣爲

各廳辦料總會之地卽應在此查其辦料多寡之數臣思河庫道一缺祇管收發帑項尙無工程地方之責况物料卽係帑項所關理應該道稽查臣擬酌派効力官數員交與該道督率稽查各廳辦料數目凡係長船裝運到工者俱令赴該道衙門掛號該道督率委員將所裝柴束查驗出給驗票交明船戶卽日開運赴工令常川收料之員照票查收如係短裝運送清江總廠之料卽無容掛號俱

令在廠委員秤收該道親自查驗之後發票
轉運各工再行秤收明白仍將原票繳該道
衙門查核如此則船戶家人亦不敢中途盜
賣致有捏報交工之弊矣一派委常川收料
之員應分別公私勤惰以定賞罰也查向時
查料之員俱係隨時差遣既不常川在工則
廳汎易於欺誑今臣擇其勤慎明白者每廳
酌派二員令其常川駐工遵照

題明勛重折正秤收并令稽查號概分晰欸項

庶各廳辦柴不致牽混短少而委員既親
要工下埽加鑲又得不時學習如該員果能
勤慎秉公則一年之後容臣量才委用以示
鼓勵若有不肖之員通同作弊一經察出將
該員一併嚴叅治罪如此則賞罰嚴明而屬
汎効力各員亦俱知奮勉自勵矣以上四條
俱臣分所當爲本不應瑣瀆

宸聰但工料所關甚大現今行之有效誠恐法久
易弛仰懇

睿裁著爲定例則物料充實修防鞏固全河各工

永賴

聖恩靡旣矣理合繕摺敬謹陳奏伏乞

皇上訓示遵行雍正十年十二月初二日

奏奉

旨所奏是當妥協照所請行該部知道欽此

建築龔家營徐家莊月堤

題爲亟請修築月堤以固河防事該臣看得山陽縣黃河南岸龔家營地方坐當黃水入海門戶最爲緊要祇因舊有縷堤臨河太近大溜汕刷河崖坍塌入裏致成掃灣險工若下埽修防工段綿長需料浩繁且全黃之水建瓴而下掃刷埽根更難保護急應在於縷堤之南圈築月堤一道避其激湍之勢以順其就下之性又阜寧縣黃河南岸徐家莊地方

去海更近雍正八年大溜日漸南徙經前

臣孔毓珣

請建月堤一道自徐家莊至陳家浦止計長二千九百八十丈原估止高八尺頂寬二丈底寬六丈續經臣等會疏

題修在案迄今復歷三載北岸沙灘日長頂沖大溜直射南岸而該處地形窪下前次所築之堤殊屬卑薄恐汎水長發黃水下注海潮上湧難資捍禦亟應加幫高厚以固隄防查

山陽縣黃河南岸龔家營上自邵家莊後起
下至吉家莊後止創築月堤一道長一千一
百五十五丈估用土方銀八千七百三十四
兩六錢八分零阜寧縣黃河南岸自徐家莊
起至陳家浦止加幫月堤長二千九百八十
丈估川土方銀一萬三百四十一兩八錢三
分零二共估銀一萬九千七十六兩五錢二
分零茲據該道確估造冊詳請核

題前來

臣

復核無異因係緊要工程照例動支

國朝奏議 卷六
部撥鹽課銀兩給發該廳募夫修築并行署
淮揚道印務夏建德監工督催及原冊送部
查核外相應會疏

題估伏乞

皇上睿鑒勅部議覆施行雍正十一年三月初七

日

題奉

旨該部議奏欽此部議准行雍正十一年五月十

四日奉

旨依議欽此

恭報秋汎水勢平穩

題爲恭報秋汎水勢平穩情形仰祈

睿鑒事該臣看得今年秋汎黃運河湖水勢長發

臣仰遵

聖訓敬謹修防多辦料物督率道廳營汎并分委
効力人員住宿工所將一切險要工程無分
晝夜上緊加修一律高厚以資捍禦各處閘
壩涵洞飭令相機啓閉以資宣洩仰賴

聖主至誠感格邳睢王家堂頂冲之處

天賜引河大溜直趨中泓通工化險爲平全河暢達
實爲

聖朝上瑞今已水勢消落各工平穩黃淮二瀆循
軌安流直達於海淮徐淮揚一帶運道民生
安瀾有慶茲據各廳呈報黃河自徐屬以至
海口陸續淨長水九尺八寸及一丈四寸不
等邳宿桃清運糧中河陸續淨長水八尺五
寸及九尺不等淮揚運河陸續淨長水九尺
四寸及一丈三寸不等洪澤湖加長水九尺

八寸各等因前來時值霜降水落工平皆由
我

皇上軫念運道民生時勤

宵旰所以朝宗順軌屢著

神庥益信

上蒼之昭格舉念可通

聖德之精虔至誠普應臣率同通工員弁殫心修

守喜睹休徵感忭交深益加敬慎所有秋汎
已過各工保固平穩情形相應恭疏

題報伏乞

皇上睿鑒施行雍正十一年九月十六日

題奉

旨據奏今年秋汎黃運湖河水勢長發

臣

等敬謹

修防竭力捍禦並將各處閘壩相機啟閉以

資宣洩仰賴

天賜引河化險爲平全河暢達實爲上瑞今時屆霜
降水勢消退各工保固平穩等語

河神福庇羣生朕心感慶前已降旨虔誠祭祀

以荅

神貺今年直隸豫省河堤均有潰決之處而江南地處下游各工平穩無恙顯係南河大臣官員殫心職守感召

神庥之明驗河道總督及在事各員俱著交部分別議叙具奏欽此

增定葦營柴束

奏爲葦營柴束繁多謹請立法清釐以濟工需
以節帑項仰祈

睿鑒事竊照江南葦蕩營原係出產工用葦柴之
所康熙五十九年於蕩地淤墊不產葦柴等
事案內將葦營裁汰由是河工柴束盡皆購
買料價每致騰貴雍正四年經河臣齊蘇勒
奏請復設葦營將從前額柴一百二十萬束之
外又加增三十萬束并於額柴之外搜採盈

餘中柴十萬餘束折正柴五萬餘束每年軍
營共採額餘正柴統計一百五十餘萬束俱
分撥各廳運貯要工照依各廳漕規柴價解
繳河庫以爲發給葦營兵餉之需立法誠善
但前項柴束原於各河營濬船之內調撥赴
蕩令河兵撐駕僂運祇因柴束繁多止令浚
船裝運九十萬束堆貯清江之王營洪福二
廠再令各廳運回本工其餘額柴六十萬束
并盈餘柴束俱令各廳僱船自行裝運遂有

不肖之員往往吝惜運脚延挨推諉遇有要
工臨期購料緩不濟急而葦營柴束採完堆
貯水口日久不運又有霉爛缺少并海潮漂
淌弁兵盜賣之弊及至各廳催船到蕩則又
無柴裝運互相推諉是以應繳柴價經年累
月拖欠不清自臣到任之後立法嚴查將從
前未清柴價逐一查出

題叅勒限追繳今年海灘一帶雨水調和蕩地
所產葦柴豐茂臣隨飭令葦營叅將黃正元

督兵竭力搜採在於每年額餘柴束之外又多採出盈餘中柴四十餘萬折算正柴二十餘萬束俱令營兵濬船裝至清江王營洪福二廠同自運額柴一併勒限令各廳全數僱運交工濟用是以本年柴束不但修防及期無悞且得多採正柴至二十餘萬於工料不無小補伏思我

皇上至聖至明一應工需皆歸實濟今該營額餘柴束若不乘此清釐之日嚴立章程以垂永

久恐日久又滋弊混臣請葺營額柴自雍正
十二年起應加增正柴二十萬束令左右二
營分採連舊額每年統計一百七十餘萬束
永爲定例令各廳照舊僱船自運六十萬束
其餘一百一十萬束仍令濬船及期償運交
王營洪福二廠分撥各工濟用繳價務令按
年清楚如有採不足額弁兵盜賣并不行卽
速裝運到工等弊廳員令淮徐淮揚二道查
察揭報營員令葺營叅將揭報容臣分別嚴

叅議處勒令賠補不許莖束短少延挨至此
外再有盈餘俱按年查明據實報部不容侵
隱設遇風潮損壞以及兩澤稀少額柴虧缺
之年亦卽查明據實報部免其追賠如此則
葦營柴束得以年清年額而應繳柴價亦不
致有拖欠日久之弊矣臣因濟工節帑起見
用收據實陳

奏伏乞

皇上訓示遵行雍正十一年十一月初一日

奏奉

旨工部議奏欽此部議准行雍正十一年十二月
二十日奉

旨依議欽此

兵夫積土章程

題爲請定兵夫積土成例以固隄防以收實效
事切照江南黃運兩河堤岸綿遠祇有河兵
看守埽壩一遇汎水長發各處調撥分身乏
術以致長堤之上防護無人臣於雍正九年
八月內

題請循照豫省之例每堤二里添設堡房一座
召募堡夫二名每名按月給工食銀五錢共
歲需銀一萬三千餘兩卽令堡夫常川防守

挑積土牛以資修補堤工之用荷蒙

皇上洪慈

恩准照例添設欽遵在案今臣嚴加督率按堡稽
查除寒暑兩月免其積土外其餘每月黃河
一堡二夫責令積土十五方運河一堡二夫
除糧船往返修補犁溝礮眼外責令積土十
二方以一年合算通共積土十五萬餘方已
收費少工多之效惟是堡夫有勤惰不齊該
管汛官亦有賢否各別若不嚴立章程恐日

久法弛難於查察 臣請核定成規以雍正十二年正月爲始責令該管汛官將所屬汛內堡夫從前積過土牛逐堡挨查確實作爲舊土報明備案卽於正月起照依前定數目每名按月如數挑積仍將挑過之土每月造於新土冊內彙報奠入交代以專責成若不能如數挑積者將耑汛文員罰俸一年該管廳員罰俸半年倘或挑積不及一半卽將耑汛文員降職一級暫留原任戴罪償挑該管廳

員罰俸一年自此章程一定則廳汛自必上
緊督率如數挑積矣再查河兵舊例每年桃
伏秋三汛俱在埽壩力作其鋪捲埽個防風
之暇理應按時積土預備鑲填之用至於霜
降後工務稍閒計算兩月日期亦應照堡夫
例每二名一月積土十五方堆積堤工備用
今查黃運兩河除樁夫埽手撐駕浚船并各
該將弁養廉之外實在力作河兵約計五千
餘名共應積土七萬五千餘方亦應將所積

土牛查明造冊入於該備弁交代項下以專
責成若該管備弁不勤加督率致有土方缺
少者卽照前定堡夫積土之例分別查叅議
處從此各汛兵夫自無閒曠錢糧不致虛糜
旣資防守之益復成積累之功伏查雍正七
年荷蒙

皇上厯念河堤每年加修五寸沿河黎庶莫不頂
頌

聖恩安益求安之至意今復設有堡夫嚴其課程

而於水勢緊要堤工單薄之處多積土牛霜降以後卽將本汛兵夫所積之土增培本汛卑薄之堤止須酌給潑水行礮之費在於每年歲修加高冊內據實聲明以節錢糧務令該管員弁盡心董理修築堅固工完委員核實查收彙冊

題報如此遞年添用兵夫積土幫堤則加高五寸各工亦可遞年逐漸減省而堤工得免殘缺卑薄之虞但

國帑堤工攸關重大誠恐奉行日久或致玩誤
廢弛相應仰懇

睿裁著爲定例則日久見效錢糧既可節省工程
又復鞏固實荷

皇恩於億萬斯年矣相應恭疏具

題伏乞

皇上睿鑒勅部議覆施行雍正十一年十一月二
十八日

題奉

旨該部議奏欽此部議准行雍正十二年二月二

十四日奉

旨依議欽此